

մի երրորդ ոյժ գայ նրանց փոխարինելու։ Երբ ես Պոլսում լսեցի անգլիական զորքերի Կովկասից հեռանալու մասին՝ հեռագրով բողոքեցի Փարիզ Քլէմանսօին և Վեհաժողովին այդ որոշման դէմ։ Այժմ այդ հարցը քննուած է Փարիզում, և ես յոյս ունեմ, որ անգլիական զորքերը կը մնան այստեղ։ Իսկ եթէ նոյնիսկ հեռանան էլ, մեր գործը պէտք է լինի գտնել դրանց փոխարինող ուրիշ զորքեր։

Երկրի պարենաւորման, զինման, ելեմուտքի կարգաւորման և այլ խնդիրների մասին ես արդէն կարգադրութիւններ արել եմ, սակայն, նայում եմ դրանց վրա, իբրև երկրորդական խնդիրների։ Անկասկած է, որ Ագրբէջանի կառավարութիւնը խախտել է անգլիական իշխանութիւնից ստացած հրահանգները, և այդ խնդիրն է այս րոպէիս ինձ զբաղեցնում։ Ես մեկնում եմ Թիֆլիս և կը պահանջեմ, որ Ագրբէջանը վերջ տայ այդ բանին, հակառակ դէպքում Ագրբէջանի կառավարութեան անդամները կենթարկեն անձնական պատասխանատուութեան։

Թիֆլիսում ես կը հանդիպեմ զօրավար Հարբօրտին, որը Ֆրանսայում գործող ամերիկեան բանակի սպայակոյտի պետն է։ Ես նրա հետ պիտի խորհրդակցեմ այն հարցի մասին, թէ ի՞նչ ձևով պէտք է օգնել Հայաստանին։ Այս վայրկեանիս Փարիզից ճանապարհ են ընկել մի խումբ սպաներ—մասնագէտներ՝ զինւորական և այլ ճիւղերի վերաբերմամբ։ Եթէ տարածութիւնը խանգարի իմ յարաբերութիւններին Փարիզի հետ, ես ինքս անձամբ կը մեկնեմ Սև ծովում գտնուող ամենաարագընթաց ականակիրով Մարսէյլ—Փարիզ՝ դեկուցանելու համար Վեհաժողովին և խնդրելու Վեհաժողովից և ամերիկեան ժողովրդից շուտափոյթ օգնութիւն հասցնել հայ ժողովրդին։ Միևնոյն ժամանակ հայ ժողովրդի և կառավարութեան վերաբերմունքը դէպի իր հարեանները պէտք է լինի բարեացակամ, որպէսզի հարեանները պարենաւորման և այլ խնդիրներում դժարութիւններ չյարուցանեն։ Ես միանգամայն կախւած եմ ժողովրդի և կառավարութեան անկեղծութիւնից։ Այժմ քաղաքական վէճերի ժամանակը չէ։ Պէտք է մտածել ժողովրդի փրկութեան մասին։

Ո՛չ մի նշանակութիւն չպէտք է տալ այն բանին, որ այս կամ այն երկիրը խլում է միւսից մի քանի վերստ հողամաս։ Այդ հանգամանքը ոչ մի նշանակութիւն չի կարող ունենալ այս կամ այն երկրի սահմանները վերջնականապէս որոշելու համար Փարիզում. ինչպէս որ եղաւ Բէլգիայի և Ռումանիայի վերաբերմամբ։

Այսպիսով, հայ ժողովրդին մնում է սպասել դաշնակիցների օգնութեանը։ Շնորհակալ եմ ինձ ցոյց տրւած ջերմ ընդունելութեան համար և ցանկանում եմ ձեզ եռանդ և ոգևորութիւն»։

Օգոստ. 23-ին Հասկելը շտապով մեկնեց Թիֆլիս և այնտեղից Բագու՝ Ագրբէջանի կառավարութեան հետ կարգադրելու համար Շարուր—Նախիջևանի հարցը։ Եւ օգոստ. 29-ին, Ուսուպէզովի հետ ստորագրեց մի պայմանագիր, որ բոլորովին հակասում էր Երևանում տւած խոստումներին։

Այդ պայմանագրի համաձայն «Շարուր—Դարալագեազի և Նախիջևանի դաւառներում պիտի հաստատուի չէզոք շրջան», որի կառավարութիւնը պիտի յանձնւի գնդ. Հասկելի նշանակած ընդհանուր-նահանգապետին։ Երկու կողմերն այդ շրջանից հանում են իրենց զորքերն ու գործակալներին, և կազմակերպւում է տեղական իշխանութիւն։